

Ársskýrsla

Skógarvarðarins í Norður-Þingeyjarsýslu 1955.

Tíðarfar var allgott mánuðina jan.-apríl og tíðast snjólétt, en frosthörkur meiri, en um mörg undanfarin ár. Frá 8. - 16. maí var versta tíðarfar og hlóð niður snjó er tók þó að mestu upp í næstu viku á eftir og voru skógarnir orðnir al-laufgaðir 25. maí. Sumarið júní - sept. var með eindæmum hlýtt og sólríkt en helst til úrkomulítið fyrir gróðurfar. Í okt.- og nóv. var oftast auð jörð, en desember var umhleyppingasamur og mikill snjór og vegir tepptir við árslok. Lauffall varð í fyrstu viku okt. eða um viku seinna en venjulegt er hér í Ásbyrgi.

Gróðursetning í Ásbyrgi fór fram dagana 2. - 6. júní og var þá enn frost í jörð til tafar. Sett var niður af hálfu Skógræktar ríkisins 300 stk. skógarfura frá Vöglum, 350 skógarfura frá Tumastöðum, 700 rauðgreni frá (Rana) Tumastöðum, 350 hvítgreni og 50 alaskaaspir.

Dagana 10.-23. júní tók ég þátt í Noregsför á vegum Skógræktarfélag Íslands. Var dvalið í Þrændalögum og unnið að gróðursetningu rauðgr. og skógarf. en farið í skemmtiferðir öðru hvoru. Var förin öll hin ánægjulegasta og um margt fróðleg. Eftir heimkomuna vann ég að hirðingu skógarins í Ásbyrgi um gestatímann en ferðamannastraumur var meiri í sumar, en nokkru sinni áður og mun það m. a. hafa valdið hve tíðarfar hér nyrðra var hagstætt, gagnstætt því, sem var sunnan lands.

Þegar hausta tók vann ég að grisjun og fram á veturinn.

Þá hefi ég leiðbeint við gróðursetningu þegar þess hefur verið óskað, t. d. komu einn dag í vor 6 unglingar ofan af Hólsfjöllum til þess að læra gróðursetningu. Hafði Ungmennafélag Fjöllunga komið upp girðingu á Víðihóli, en efnið í girðinguna hafði Vernharður Þorsteinsson fyrrv. menntaskólakennari gefið félaginu.

Ásbyrgi 30. des. 1955

Erlingur Jóhannsson

(sign)